

Na osnovu člana 17. Zakona o Savjetu ministara Bosne i Hercegovine ("Sl. glasnik BiH", br. 30/03 i 42/03) i člana 176. stav 5. Zakona o carinskoj politici Bosne i Hercegovine ("Sl. glasnik BiH", broj 57/04), Savjet ministara Bosne i Hercegovine, na prijedlog Upravnog odbora Uprave za indirektno oporezivanje, na \_\_\_ sjednici održanoj \_\_\_\_\_ 2005. godine, **d o n i o**  
**je**

## **O D L U K U**

### **o postupku ostvarivanja prava na oslobađanje od plaćanja uvoznih dažbina na opremu stavljenu u slobodan promet koja predstavlja ulog stranog lica**

#### Član 1.

Ovom odlukom propisuju se bliže odredbe o postupku ostvarivanja prava na oslobađanje od plaćanja uvoznih dažbina na opremu koja se stavlja u slobodan promet prema članu 176. stav 1. Zakona o carinskoj politici Bosne i Hercegovine, a koja predstavlja ulog stranog lica, osim putničkih vozila, automata za zabavu i igru na sreću.

#### Član 2.

U smislu ove odluke, primjenjuju se sljedeće definicije:

1. Pod pojmom "oprema" podrazumijevaju se:

- a) stalna sredstva za obavljanje registrovane djelatnosti, njihovi rezervni dijelovi, stvari sitnog inventara određene prema propisima o amortizaciji, uređaji i dijelovi uređaja za zaštitu čovjekove sredine, sredstva za zaštitu na radu i ličnu zaštitu, osim putničkih vozila i njihovih rezervnih dijelova, automata za zabavu i igru na sreću, te njihovih rezervnih dijelova;
- b) materijal za izgradnju i popravak građevinskih objekata za obavljanje djelatnosti, instalacijski materijal i proizvodi koji se uključuju na instalacijsku mrežu kao njihov sastavni dio.

2. Pod pojmom "putničko vozilo" podrazumijeva se terensko vozilo ili vozilo za prevoz putnika s najviše devet sjedišta, uključujući i sjedište za vozača.

3. Pod pojmom "automati za zabavu i igru na sreću" podrazumijeva se roba koja se svrstava u tarifni broj 95.04 Carinske tarife BiH (proizvodi za vašarske, stone ili društvene igre, uključujući flipere, bilijar, specijalne stolove za kazino igre ili opremu za automatske kuglane).

4. Pod pojmom "oprema koja predstavlja ulog stranog lica" podrazumijeva se oprema kako je definisano u tački 1. ovog člana koja:

- a) se uvozi, a koju inostrani ulagač, na osnovu ugovora o ulaganju, investira kao svoj ulog u pravno lice, ili
- b) se uvozi u ime i za račun pravnog lica, ako se plaća sredstvima pribavljenim iz uloga inostranog ulagača u to pravno lice.

#### Član 3.

1. Radi korištenja carinske povlastice iz člana 176. stav 1. Zakona o carinskoj politici Bosne i Hercegovine, korisnik povlastice, uz pismeni zahtjev za oslobađanje od plaćanja uvoznih dažbina, carinskom organu nadležnom prema mjestu sjedišta korisnika povlastice podnosi:

- ugovor ili drugi odgovarajući akt o ulaganju inostranog ulagača u pravno lice, na osnovu kojeg se uvozi oprema za koju se traži oslobađanje od plaćanja uvoznih dažbina,
- dokaz o registraciji stranog uloga kod nadležnog organa Države,
- specifikaciju opreme po tarifnim oznakama i naimenovanjima iz Carinske tarife BiH, uz označavanje količine, te pojedinačne i ukupne vrijednosti, ovjerenu od korisnika povlastice,
- izjavu ulagača da oprema nije starija od 10 (deset) godina,
- potvrdu da oprema koja se uvozi zadovoljava standarde u pogledu zaštite čovjekove sredine i ostale standarde iz oblasti zaštite na radu, izdatu od institucije ili drugog tijela nadležnog za područje te djelatnosti.

2. Po zahtjevu iz stava 1. ovog člana, nadležni carinski organ donosi rješenje u roku od 15 dana od dana prijema zahtjeva.

#### Član 4.

Carinski organ iz člana 3. ove odluke vodi evidenciju o korisnicima, vrsti, količini i vrijednosti opreme uvezene prema članu 176. stav 1. Zakona o carinskoj politici Bosne i Hercegovine.

#### Član 5.

1. Oprema uvezena uz oslobađanje od plaćanja uvoznih dažbina prema članu 176. stav 1. Zakona o carinskoj politici Bosne i Hercegovine, ne smije se, bez prethodne pismene obavijesti carinskom organu iz člana 3. ove odluke o tome i prije izvršenja obračuna i plaćanja odgovarajućih uvoznih dažbina, prodati, posuditi, dati na upotrebu drugom, dati u vidu garancije, iznajmiti ili prenijeti kao osiguranje za druge obaveze..

2. U slučaju nastupanja okolnosti iz stava 1. ovog člana, obračun uvoznih dažbina obavlja se po stopi koja se primjenjuje na dan nastupanja tih okolnosti, a na osnovu vrste robe i carinske vrijednost koju je na taj dan utvrdio ili prihvatio nadležni carinski organ.

3. Carinski organi imaju ovlaštenje da preduzimaju sve potrebne mjere kako bi se osiguralo da se oprema koja je stavljena u slobodan promet uz oslobađanje od plaćanja uvoznih dažbina po osnovu stranog uloga ne koristi u druge svrhe od onih za koje je oslobođena, bez plaćanja odgovarajućih uvoznih dažbina.

#### Član 6.

Danom stupanja na snagu ove odluke prestaje da važi Odluka o postupku ostvarivanja prava na oslobađanje od plaćanja carine na opremu stavljenu u slobodan promet koja predstavlja ulog stranog lica ("Sl. glasnik BiH", broj 14/01).

#### Član 7.

Zahtjevi za oslobađanje od plaćanja uvoznih dažbina po osnovu stranog uloga, zaprimljeni nakon početka primjene Zakona o carinskoj politici Bosne i Hercegovine ("Službeni glasnik BiH", broj 57/04), a koji do dana primjene ove odluke nisu riješeni, rješavaće se u skladu sa odredbama ove odluke.

Član 8.

Ova odluka stupa na snagu osmog dana od dana objavljivanja u "Službenom glasniku BiH".

Broj: \_\_\_\_\_  
Dana, \_\_\_\_\_

**Predsjedavajući  
Savjeta ministara BiH**

**Adnan Terzić, s.r.**